

Cheeti da cada da Pawlo sa Timoteeyo

Gimba guri giyaada

Qatlay Pawlo giyaa ilii handikimi cheetiti, yaa jeerage wana hhapee da Ruumige haa yaa caahhi tuba, ina dugu cira gaasi. Teesaaqay, ina yaati slai Timoteeyo maa cira khay daqa dosii. Waka'alee, Timoteeyo yaa iliia'ay Pawlo hari khisla, Pawlo gugi slai ina nankosi loi pahha.

Cheetitii Pawlo ti laqaaqana iliikooma dosi da hida goó/ɓbee Yeesu, hhaã goó slawee laba'asu. Slime, ina muuna hii/atliitlimisi Timoteeyo, ma ilakoomi/ɓmba ya/aboo da Kristu. Ya/abotee magi kakaami hari/atlimaa, gimati qatlay gu gimbadi-ira, haa ma ilii/oo'i maarimamaa da afa'afuuma.

Cehheemisu gu Pawlo daqa Timoteeyoge

¹ Ana Pawlo, Iliitleemu naayii leehhi, ma ya/abimiisay gu Kristu Yeesu tleehhidi, hari sla'amuu gosi, ma kakaami sa hida slafimaa hhakira, daayii fadidi ha Iliitleemu hari amoo da ilagaasaraa daqa Kristu Yeesuge. ² Timoteeyo, ugu ti nankoy ga slae /ɓmbaraage. Ana firiirima ambee, hhoinay gu didiru, /awaariru haa qasaw goó daqa Iliitleemu dahha, Taataa goori haa daqa Looimoo gu Goõ Kristu Yeesu, ibiidiye sliimaa haa ugu.

Pawlo idoo giyaa ilii muuna hii/atlisi Timoteeyo

³ Timoteeyo, ana ha daareeremisa Iliitleemu, hĩ soó yondiide hari muuna gu hhou, idoo daa ilii yondiidi gooay okokoõĩ koi. Amasi haa tleemaa, qatlay goó ilii firime sa ugu, ina goó mawaaba daareesa sa ugu. ⁴ Gu lou, hoóyii slaslaw hherehheraa koku, kara hagoóti sla'a magu arimi ugu ciraai, ma haci hha'aloo muuna gooi. ⁵ Kara ana hoóyii slaslaw /imba doogu doóba peereehhiya ga konte daqa Kristu Yeesuge, /imbatee daa kone slime ha maamaa doogu Looyi haa iyoo doogu Euniike. Gu lou, ana goo ilatahhe, /imbatee slime ga konta. ⁶ Sa gimbakee, ana sla'a mayii slaydi, ma ilahamisidi /uurukee gu muuna sugwaa qay ha Iliitleemu, qatlay gwaa ilii qaasi dabaĩ koi sa yondu gu Iliitleemu. ⁷ Teesaaqay laqe, sa gimba Iliitleemu sandaa qayiiiba dandiray muuna gu tla'amee. Ina sindaati qay muunaiĩ kotii muuna gu /uuru guri yondu sa Iliitleemu, muuna gu sla'amuu haa waaway hangigi ga/ayna dandiray kilakoti.

⁸ Inkoo hhanti ilamurita kakaaru sa hida gimba gu Looimoo goori gu goõ. Kara hhanti anta ilamuree sa ana daa khiidimi jeerage sa Kristu. Ba/ay hari /uuru gu Iliitleemu ugu see /imbi, ma dugu laba'asi ana pahha, sa kakaaru Gimba gu Hhou gu Kristu. ⁹ Iliitleemu naa ilabu'umi dandiray tlakwaroogo, kara naa eteedi dandiray, ma dandi tlinti'isi haa gimba gu khoroti hida kosi pahha. Hindaati eteediiba, sa gimba gu yondu goori gu hhou. Teesaaqay gooba! Hindaati eteedi sa ilakhuukhu'usa dosi giyaa kone haa sa hhoinay gosi gu didiru. Hari amoti da Kristu Yeesu, Iliitleemu sindaati

laqami hhoínay gosi gu didiru, giraa ilii kahhiye see khawaraa khoodoti. ¹⁰ Arimi inkoo, Iliileemu sindaa hiitlaa'asi dandiray hhoínay gosi gu didiru, hari amoo da khawaraa dosi Il-abu'umiisay goori, Kristu Yeesu. Qatlay ina giyaa iliica'í ayisago, yaati kaba'í /uuru gu gwaa'araa, kara hari Gimba gu Hhou yaatii tlaa'asi slafimaa goóba tlakwaakwaw coko'ó seei.

¹¹ Iliileemu hinaa hiileehhi, ma kakaami Gimba gu Hhou gu Yeesu, ma leehhisi gimbakee daqeemoo paslaapasloo haa ma caacaahhamisi hida goó. ¹² Sa gimbakee, ana sagani laba'asuge waara ti'ii jeerage. Teesaaqay see, ana ilamuriidaaba sa ilapingiruki, sa gimba Kristu goó /ímbe hagu khua. Kara ana kooma /atlimaa balalu sliimaa tuba, maati amoolaa khay karaai, ina hiidahhasi ga'aw nara'a gimbaki gu hiiloo, gwaa oodi balotiraa.

¹³ Ugu ilakoomi caacaahhamisu hida gimba gu lou, nama caacaahhamisukee loi loi gaa akhasidi daqa dooaa. Teesaaqay laqe /ímbage haa sla'amuu gu waara ilagaasaraa daqa Kristu Yeesuge. ¹⁴ Ga'ay nara'a gimbakee gu lou, idoo gwaa iliioodi gooay daqa Iliileemugo. Ugu ga'awaku hari /uuru gu Muuna gu Iliileemu goó ibiida daqa doorii.

Muunaiĩ gu hida wakinay pandaa da Pawloge

¹⁵ Ugu ha khu'uda tuba, hida wa'a hhaã goó /ímbee Kristu, goó ibiidee hhapee da Aasiyage, hinaa kwahhiri, tla'aã gooinay wanay Figeelo haa Herimogeene. ¹⁶ Taataa Iliileemu laqane /awaariru sa hida gu mara gu Onesifooro, sa

gimba ina yaati nikiikina khakhawu daqa dooi, nagi muunaboo/eesi, yaa ilamuriidiiba, sa gimba gaa khiidimooge waare. ¹⁷ Qatlay giyaa ilii day yaamu gu Ruumige, ina naa dabiidi hari khisla daqeemoo sliimaage, hinaati amoolaa slay. ¹⁸ Looimoo gu Goõ sugu laqane /awaariru balotesii gimaa kara ilii khaye. Kara ugu khu'uda hari khisla, idadu wa/a giyaa yondiidi sa ana yaamu gu Efeesoge.

2

Yondiidi yondu gu Kristu Yeesu ubee sirikaarimoo gu hhou

¹ Inkoo, Timoteeyo nankoy, /atlii nara'a hhoiinay gosii gu didiruge gu Iliitleemu ilagaasa daqa Kristu Yeesuge. ² Ugu hanaa akhasidi ana caacaahhamisu gu Gimba gu Hhou gu Kristu pandaa da masaydii wa/age. Inkoo, ugu see taatahhi caacaahhamisukee sa hida wakinay doó /ambiye gumaa hiidahhasee caahharaa, ma caacaahhamisiri hida wakinay. ³ Kaasii laba'asu sliimaa haa dandiray, goó slayne sa gimba gu Kristu, sirikaarimoka'a pahha gu hhou gu Kristu Yeesu. ⁴ Sirikaarimoo goó yondiida yondu gu sirikaarii, yoó slaiyaaba karaai mangi ilagaasi haa yondu goó yondiidane balalu sliimaa ibinaa doorii. Ina yoóti slai muunaboo/eesa heedi, gwaa qaasu ina yondukesii. ⁵ Kara heedi hingoó kabaaba/a taa/adimoo haa dene'ee kosi, hiidahhasiyaaba kaba/araa, gi slay idoo da qawaraa, bere guba iliikoomaraa nara'a sariyaa goõ da taa/adimoo. ⁶ Nama teesaaqay leẽ, dooslimiisay

goó yondiida hari maguuma, ina haraa hiiboof slawaraa deehharaa da pandaa da /aamu gu yondu gosi. ⁷ Ilatahhe gimbaki sugu kakaakame, ma'aana dugu iliiaze ha Iliitleemu, ma hiidahhasidi caahha gimbakee sliimaa.

Kristu Yeesu na heedi doó iliipa'ane

⁸ Balalu sliimaa slayii Yeesu Kristu! Ina dugu-naa slafisi yaagii ca'í ayisago, kara ina okookoo gosi gu didiru na mutemi Dawdi. Hiĩ na Gimba gu Hhou goó kakaame sa hida, ⁹ kara hatee na idoo sa laba'asuge waare. Ana dinaa khiidiidimi hari nyololoo ha sirikaarii da Ruumi ubee, ana yaati fiisiisay pahha. Teesaaqay see, gimba gu Iliitleemu duguyii dahhasiyaaba khiidiru. ¹⁰ Teesaaqay hoó tooaa kaanahhasa laba'asu sliimaage, sa hida dayii leehhi ha Iliitleemu, ma digi ilabu'umi ha Kristu Yeesu daqa wanqamee dosii da ina lenkosi da koraraa haa koraraa goóba hiifaakoo.

¹¹ Gu lou, haã na kaawaraa da /ambaraa:

Bere haa kaka/ani haa ina,
dandiray maa ibiidana slime haa ina,

¹² Bere ha ilakona hiikaasa,
dandiray tawaalina slime haa ina,
bere hagu tlankana, ina see hindi tlanki.

¹³ Bere hagu /ambanaaba ina,
ina yoó tosaa meeti /ambarage,
sa gimba hingi tlankiyaaba ina lenkosi.

Yondimiisay daa /ambi ha Iliitleemu

¹⁴ Ilakoomi hiislaslaw sa hida gimbakee sliimaa suguũ kaay. Gadimakii pandaa da Iliitleemuge hhanti naanaqamidiyay sa gimba

guba faydaa, goóba iliawaraa heedi lensee, kara yoóti hhamisi iliipa'aru gu hhakee goó akhamisee. ¹⁵ Karahhi hangu laqante pandaa da Iliitleemuge, gi yondimiisayka'a pahha tleehhita daa /ímbi ha ina, goó waka muriidisaraa yondu gosi. Ugu caahhi gimba gu Iliitleemu, gugi caacaahhamisida nara'a.

¹⁶ Hangu hhanti ilagaasida haa idara gu bawma, guroóba khawa muree daqa Iliitleemuge, sa gimba gimbakee yoó deehhi hida segenge haa Iliitleemu. ¹⁷ Caacaahhamisukee koina, yoótii tlakhway inkaahhayka'a pahha goó /sima slaqwa goó da heedi, gi slayda slaama. Tla/aã gu hida hhakesii wanay, Himenaayo haa Fileeto, ¹⁸ hhakee gwaayii fookidee gi mayri gimba gu lou. Inay yoó caacaahhamisiyay afa'afuumati tuba, Iliitleemu yaa hhe'esi yaa slafisi hida ayisasugo, kara hida hhakee yaa hhamisiri /imba da hida wakinay.

¹⁹ Gimaati teesaaqay see, gimba gu lou gu Iliitleemu yaati qadidi nara'a ubee, musingi daa tleehhi nara'a, daa ilii qaasi chapaa daa handikimi taai, “ ‘Ina Looimoo gu Goó khui hida kosi,’[☆] kara ‘Hida goó eteedimee uma gu Looimoo gu Goó, kwanda gi mayee tlakwaroo.’ ”

²⁰ Inkoo mara gu didiruge gu hhou wana khooslay gu hhou gu sahaabu haa feesa. Kara wana khooslay daa boo/imisi hari bangasayi haa tipa. Khooslaykee gu hhou duguroóti yondiidi baloo da losonailee, kara hikee waku yoóti wana

[☆] **2:19** 2:19 Yu'udii kitaabuu gu Faadoo 16:5.

sa yondu gu balalu sliimaa. ²¹ Inkoo, bere heedi hingi ilabusli haa tlakwarotee sliimaa, ina ti khooslimoka'a pahha tleehhidi daa tlinti'isi sa Iliitleemu, goó ilia'awa Looimoo gu mara, daa ilakhuukhu'usi sa yondu sliimaa gu hhou.

²² Tlinti'ii slahhaahhaau gu tlaku gu qarau-umaa, ba/ay karahhii ibinaa daa tafa'adi pandaa da Iliitleemuge, Ambaraage Kristu, sla'amuu gu hidage haa dabiiduu ibinaa da qasaw. Teesaaqay laqe haa hida hanki goó firiirimee Looimoo gu Goõ hari muunaiñ gu hhoi. ²³ Inkoo ugu hangu hhanti ilagaasida haa kabaaba/uda guba faydaa haa gu bawma, sa gimba ugu khu'uda kabaaba/ukee haroó khay naanaqamoo. ²⁴ Tongimoo gu Looimoo gu Goõ kwanda hhanti naanaqamidi haa hida. Ba/ay ina ti laqane hhoi naay daqa hida sliimaage, maarimuu gu hhou tleehhidiye, goó hiikaasa gimba paslaapaslooge. ²⁵ Kara ina ilii/oo/imine aslaa'amee hari caacaahhamisu hida hhaka'a goó kanimisee ina. Hari iliipa'aru tuba, muunaiñ koinay digi pihhiye ha Iliitleemu, ma kwahhiri tlakwaroo dooina haa gii fookidiyay daqa dosii, ma caahhiri gimba gu lou. ²⁶ Kara digiri giyaadiye ha Iliitleemu, kara ilahudaa koina ma hiiki/iri haa ma hiitlinti'iri hatliroo da Biriisimoo, hikee gwaa khiidimu muunaiñ koina, ma yondiidiri idoo gi ina slaiye.

3

Tlakwaroo da hida balalu gu hiifaakooge

¹ Inkoo Timoteeyo, caahhi gimbaki gu hii-iloou, damaa khay diqimi gwaa maanuudee hari

khisla, balalu hhankii gu hiifaakooge. ² Sa gimba hida hingimaati slaiyay inay kilakoina, himaa slaiyay peesay, hingimaa hiiakhasiyayi, maa konay hha'aloo, maa wahaahanay Iliitleemu, maa gwaa/iyaaiba ayiĩ haa amu koina, maa kaayayiiba /iisoo haa maa tlinti'isiyaaiba ibinaa dooina sa Iliitleemu. ³ Kara himaayii caca/iyay hida gumaaba sla'amuu, goó wakee digima ila-gaasi, goó iliitlohhideei, goóba harii ki/a, gwaa daraarabee haa gu wakee hhoinay. ⁴ Kara himaa hiicaca/iyay hida goó fokimidee dene'ee koina, gwaa sagaiĩ karaarahhee, hingoóyii akhasee hari khisla, goó slae gimba gu khoodoti, kara tay Iliitleemu giyoóti wakiyay. ⁵ Inay ti hida hingoó laqamee hari khoodoo tuba, Iliitleemu giyoó muriidiyay, kara tay yoó tooina tlatlankinay /uuru gosi. Hangu deehhinte haa hida gu teesaaqay slanqasee.

⁶ Tla/aã gooinay wanay hhawatee goóyii gu-maaguume maraai gu hidage harii coridu guyii oyimiru tigay goóba hiidahhasa caahha amoo daa tafa'adi muunaiĩ koinay. Hhakee digaa ilii loay ha tlakwaroo dooina, digaa tawaalimi ha slahhaahhaau paslaapasloo. ⁷ Tigay hhakee yoóti slaiyay mangu caacaahhamisiri gimba gu /abu, kara tay inay yoóyii dahhasiyaaiba caah-haraa gimba gu lou gu Iliitleemu. ⁸ Qatlaykiraa gooay Yanee haa Yamburee giyaa ilii kanisiri Musaa. Nama teesaaqay maarimamatee da afa'afuumaa kaniinimisida gimbaki gu lou. Waway gooina dugwaa hhamisi ha tlakwaroo, kara hari bara da /imba dooina digaa si'i. ⁹ Arimi inay

ti dayaaiiba segenge, sa gimba bawma dooina dagaa arimi ha hida sliimaa, idoo gi slanqaside, qatlay daa ilii arimi gooyay bawma da Yanee haa Yamburee.*

Ilakaawaraa da Pawlo daqa Timoteeyoge

¹⁰ Inkoo ugu Timoteeyo, ha khu'uda hari khisla caacaahhamisu gooi, ibinaa dooi da balalu sliimaa, taariru gu ibinaa dooi, /imba dooi daqa Kristuge, hiikaasa dooi, sla'amuu gooi gu hida, idoo goó ilii khoce pandaage, ¹¹ laba'asu gooi haa ilahufiduu gooi. Ugu ha khu'uda gimba sliimaa gwaa slay yade yaamu gu Antiyookiyage, Ikoniyaage haa Lisitiraage. Gu lou, yade ana haatii kaasi laba'asu gu didiru. Teesaaqay see, Looimoo gu Goó naagi tosaa ilabu'umi gimba-keesaa sliimaago.* ¹² Gu lou, caahha tuba, hida goó gu slae ibinaa da muriidaraa da Iliitleemu, ilagaasaraa daqa Kristu Yeesuge, digi laba'asi. ¹³ Kara tay hida gu tlakwi haa afa'afuusee, maa ilakonay ibinaa tlakwarooge hari khisla, mayii coridii hida wakinay, inay see digimaa tooinaa hiicoridi ha hida wakinay.

¹⁴ Gimati teesaaqay see, Timoteeyo, ugu ilakoomi oowaraa gimbakee dugwaa caacaahhamisi, gugi ma'adi nara'a, sa gimba ugu ha

* **3:9** 3:9 Yanee haa Yamburee: Kanisaa yoóti ilahudeesida tuba, Yanee haa Yamburee ti minslisee da hhapee da Misiri. Yu'udii kitaabuu gu Hiica/araa 7:11-12; 8:18-19; 9:11. ✨ **3:11** 3:11 Yu'udii kitaabuu gu Yondu gu Ya/abimiisee 13:13-52; 14:1-20.

khu'uda ha miyaa nugwaa caacaahhamisi gim-baki sliimaa gu lou. ¹⁵ Tlaatleesoo da daaqau-umaa doogwaago, ugu dugwaa caacaahhaahhamisi Handikatii da Iliitleemu, goó hiidah-hasa qawaraa waaway sa ilabu'uruu googu hari amoo da /imba Kristu Yeesu. ¹⁶ Handikaa sliimaa da Iliitleemu ha hida nagaa handikiniri harii laalaqamisuu gosi. Handikati yoó iliiyda caacaahhamisu gu hida, ilii/oo/imiru tlakwaroo dooinaa, tafa'amisu gu amamu koina haa hi-ilaalaqamisuu idoo gi ilii ibiidiye, haa gigi/agitinay hari amoo da ibinaa daa tafa'adi pandaa da Iliitleemu. ¹⁷ Teesaaqay heedi gu Iliitleemu, dakusiyaaba gimba lensee, qadidage nara'a ma yondiidi yondu sliimaa gu hhou.

4

Hiigadiruu gu Pawlo gu hiifaakoo daqa Timoteeyoge

¹ Timoteeyo, hagu sla'a ilakaawa pandaa da Iliitleemuge haa pandaa da Kristu Yeesuge, hiĩ gumaa hukuma hida gu slafee haa gwaa kaka/ee, haa sa gimba maa ki/ karaai, ma tawaalimi tawaaloo dosi: ² kakaami gimba gu Iliitleemu! Hangu ilakhuukhu'uside teesaaqay laqaraa, hida gima slairi haa gima slaiyaaiba see akhamisu. Ugu hari muuna gu hiikaasa haa hari caacaahhamisu, laalaqamisii hida gi tafa'asiyay ibinaa dooina, ilakaawaki haa ilii/oo/ii tlakwaroo dooina, kara /atlisii muunaiĩ koina. ³ Qatlay maa khay, hida maayii kaasiyaaiba itatimisu caacaahhamisu gu lou, gooba fokimidu. Inay ma sirakonay slahhaahhau gooina harii

kurunkuriru maarimamaa paslaapasloo, gumaa caacaahhamisee gimbaka'a kilesi gi slaiyee itatimisu, soó khaciye eaa koina. ⁴ Inay si'iyay akhamisu gimba gu lou gu Iliitleemu, maatii fookidiyay sa akhamisu gu catimisu gu afuafu-umaa. ⁵ Teesaaqay see ugu Timoteeyo, hangu ga/ayde ugu lenkoogu, gimba sliimaage gwaayii ca/a daqa dooguu, kaasii laba'asu, qoomeesii Gimba gu Hhou, gaamisii yondu sliimaa sugwaa kaay ha Iliitleemu.

Kawaraa da Pawlo tuba gwaa'araa dosi yaani daadi

⁶ Sugunti kaay ilakaawaratee, sa gimba qatlay gooi gu gwaa'araa yaani day. Ibinaa dooi daga slai hadisa sadaaka da difaay doó hiieesiye pahha masabaahuge. ⁷ Ana haã yondiidi yondu gu Kristu hari /uuru gooi sliimaa, heedika'a pahha gwaa qwaatlu, qwatla gu hhou, handii faakisi hhiyuuma dooi, heedika'a pahha guñ kaba/u taa/adimoo, kara haã ga/ay /imba dooi. ⁸ Inkoo sinaa qaasi hhamaa gu kaba/amuu gu ibinaa da hhoi ha Looimoo gu Goõ, Hakiimuu gu hhou, sinimaa haysi baloteesii. Kara ti ana kilesiiba, ti ana sliimaa haa hida goõ hhaã goó baqamidee ki'eemoo dosi hari kwayru gu didiru.

Tongimoo daa may

⁹ Timoteeyo, laa hiislehheesida khaymu, manaa arimaa kaydi ana. ¹⁰ Deema hhia goori hinaa may ana, sa gimba gu sla'amuu gu kooroti da inkoo, gi waaudi yaamu gu Tesaloniikege. Kreesike yaa waaudi yaamu gu Galatiyaage, kara Tiito yaa waaudi yaamu

gu Dalimaatiyage. ¹¹ Luuka kilesi naa meeti ti'ii sliimaa haa ana. Dabiidi Maariko daqa gi iliiwane, yaa sliimaa khaye haa ugu tay daqa dooi, sa gimba ina hinoó ilia'ay yondu gooi. ¹² Tikiiko hagwaa ya/abi yade tongoo da Efeesoge. ¹³ Qatlay gamaa ilii khayde, toogwaa sinaa hubite qayru gooi naykee gwaa may daqa Karipooge taysi tongoo da Tiroowage. Kara sinaa hubite kitaababatira, hatee loi daa boo'imi hari faloo.

¹⁴ Alekisaanda sapidiisay, hira khay tlakwaroo wa/a daqa dooi. Inkoo ina dugumaa hukuna ha Iliileemu sa gimbakee sliimaa giyaa yondiidi daqa dooi. ¹⁵ Slime ugu seei hangu ga/ayde ugu lenkoogu haa Alekisaanda, sa gimba ina yaa kanisi hari khisla Gimba gu Hhou gu Kristu goó caacaahhamisane dandiray.

¹⁶ Qatlay gu /aa'imu gooi gu pandaa, sinaa ilii leehhisi pandaa da /agitiruge, yaa wanaaba heedi lensee gwaa qadidu hari bara dooi, hida sliimaa hinaati lakidiri. Firiirima Iliileemu, sigi hhanti faadi konay tlakwaroo gimbakeesii. ¹⁷ Teesaaqay see, Looimoo gu Goõ yaa qadidi haa ana, sinigi qay /uuru, ma kakaami Gimba gu Hhou goõ sa hida wa/a gu hhapapu wakinay, ma akhasiri. Kara naati ilabu'umi pahha afa gu diidawgo. ¹⁸ Taataa Iliileemu hinimaa ilabu'una ana yondu sliimaago gu tlakugo, hiniraagi day nara'a tawaaloo gosii gu rawaa gu rawge. Ina dugu daareesiye ha hida koraraa haa koraraa goóba hiifaakoo! Guti lou.

Cehheemisu gu hiifaakoo

¹⁹ Asunkuulee hhoora sini cehheemisiide Piriisila haa hhawata gosi Akiila. Kara sini cehheemisiide, hida goõ goó mara gu Onesifooroge waaree.

²⁰ Eraasto yaa meeti yaamu gu Korintoge. Kara Tirofimo gwaa yade mamay mamaí yaamu gu Mileetoge. ²¹ Slehheesaayuu khawaraa tay, da ilii kahhiye dawaraa qatlay gu kijaajimoo gu dihhu. Dugwaani cehheemisi ha Eubuulo, Puude, Linoo haa Kilaudiiya hhioo doogu, slime haa hhiee koku sliimaa.

²² Inkoo, firoo doyi na nahaã ambee, Kristu Yeesu sliimaa ibiidiye haa muuna googu. Kara hhoinay gu didiru gu Iliitleemu ibiidiye haa unkuray gonkokunaa.

**Ilaʼimbidu Gu /abu hari Burungaisoo
Burunge: Ilaʼimbidu Gu /abu hari Burungaisoo
(Bible)**

copyright © 2019 Wycliffe Bible Translators, Inc.

Language: Burunge

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

5fd9f69c-03b6-5343-85b8-5043bec70185